



11

7保土  
5144  
4





門可保4  
號 5144  
卷 246-4

五代會要卷十五



宋 王溥撰

考功

後唐天成元年十月三日尚書考功條奏格例如後一  
准考課令諸司内外文武官九品已上每年當司長官  
考其屬官應考者皆具錄一年功過行能議其優劣定  
九等考第京官九月三十日已前校定外官去京一千  
五百里內八月三十日已前校定三千里內七月三十  
日已前校定五千里內五月三十日已前校定七千里



丙三月三十日已前校定萬里內正月三十日已前校定本州定訖京官十月一日送簿外官朝集使送簿限十月二十五日已前到京考後功過並入來年無長官次官考縣令已下及關鎮庶官獄瀆令並州考津非隸監者亦州考一准考課令諸每年考簿集日考司校勘訖別爲簿具言功過京官三品已上及同中書門下三品并平章事奏裁親王及五大都督府亦同四品已下及餘外官並使人量定聞奏單數仍備狀進中考並單名錄奏一准考課令諸每年尙書省諸司得州牧刺史

縣令政有殊功異行及祥瑞災蝗戶口賦役增減當界豐儉盜賊多少並錄送考司一准考課令諸官人治迹功過應附考者皆須實錄其前任有犯私罪斷在今任者同見任法卽改任應計前任日爲考者功過並附其狀不得過兩紙州縣長官須言戶口田地者不得過三紙註考正之最一最已上有四善爲上上一最已上有三善或無最而有四善爲上中一最已上有二善或無最而有三善爲上一最已上有一善或無最而有一善爲中上一最已上或無最而有一善爲中中職事粗



理善最不聞爲中下愛憎任情處斷乖理爲下上背公  
向私職事廢闕爲下中居官詔詐及貪濁有狀之類爲  
下下若於善最之外別有可嘉及罪雖成殿而情狀可  
矜或雖不成殿而情狀可責者省校之日皆聽考官臨  
時詳定一准考課令諸官人因加戶口及勸課田農并  
緣功進考者於後事若不實縱經恩降皆從追改一  
准式校京官考限來年正月內外官考限二月內者所  
司至三月內申奏了畢伏以書校內外官考課逐年申  
送考簿各有程期近年已來諸道州府及在京諸司所

送考解多是稽違自今後所申考簿如違格限二十日  
不到其本判官并錄事參軍伏請各罰一百直本典句  
官請委本道科責如違一月日已上不申到本判官伏  
請罰二百直錄事參軍量殿一選本直句官請委本道  
重加懲斷在京諸司如違格限不關牒到者其本司人  
吏牒報御史臺請行追勘一准格應所闕縣令計日成  
四考餘官計日成三考闕今後州縣官等並許終三十  
箇月成三考自上官後至年終但滿一百八十日便與  
頭考次二年卽須兩考滿足如頭考滿足第二考全足



卽許計日成未考方與三十箇月事理合同如過月限無替人到准上條處分者伏以每年書校官員考課格限則顯有舊條授上則難爲定制但以每月之內皆有除移今准格且以六月內上爲準一應申校內外六品已下赴選官員考課准格自上任後但滿一百八十日便與成頭考年終非書考時須至來年准格書校時併申兩考如六月已前直至正月到任者自上任日至校考時頭考日足卽考後功過並入來年如至書校時頭考欠日未成資考亦至來年准格書校時併申兩考如

六月已後至年終上者並至准格日收計一考有剩日不在重使之限一應經考後合收次年以一周歲爲限如未滿一年停替者但及三百四十日與成如欠日不在收計之限一應收未考但經考後去任時得及二百日與成如欠日不在收計之限如過月限無替人並准上條處分一應申校內外赴選官員考課頭須具經考已後課績不得重疊計功其未考須具得替年月日比類升降一應申校內外六品已下官員考第以去京地里遠近逐年書校申送考解各有程期今後應內外赴



選官員考第既准格依限逐年比較卽不合更將州府及本司考牒爲據其有已前罷任官員不計年限考第未經省校者如有州府及本司考詞考牒全備者欲據在任年月日檢勘省司給與牒知如在任之時州府及本司向來元不曾書校給牒祇於解由厯子內批出考數者欲與檢勘解由厯子內不豎過犯稱在任日並無公事遺闕證驗分明亦據在官年月日給與牒知如檢勘無憑者不在給牒之限其今年各准格赴集選人便合請給省校考牒直至南曹受納告勅已前並許經所

司投狀檢勘出給其考牒又准格須奏下當年內出給如隔年者不在行使之限如或實有事故次年內請給自今後當年奏下勅考許至來年內請給如更違格限請一年與殿一選如至三年外不請給者所司不在出給之限其已前校奏下內外赴選官員考課其間有未曾請給考牒者並合投狀請給以備選曹磨勘如將來選人今在考第依前固違格條不經省司勘校給牒及已曾奏校下勅考不請給考牒者南曹不在檢勘判成之限一應申投內外官員考課文解須依格限到省如



五代會要 卷十五 五  
申發後其間或有非時事故停任所司無以得知請委  
本判官并錄事參軍專切提舉事由申省以憑點校錄  
奏一准故事校考舊條內外官員並校考之時諸道差  
朝集使應考內卽差中書舍人給事中監考伏自校勘  
不行往例盡廢自今後省校之時伏請中書門下選差  
清望官兩員監校內外官員考課便同點校申奏其合  
經申中書門下兩省准例各供宣黃清守舊規以爲永  
制一應申校內外官寮考課如有過犯便降書下考如  
在任之日於常課之外別有異績可稱比之上下考如

諸道州府及在京諸司故違格例不具錄在任事績功  
過依限比較申牒到省其本判官并錄事參軍及在京  
諸司並請准前殿罰一應諸司諸流外職掌人等准令  
本司量其行能功過立四等考第而勉進之今伏請准  
新定格內條件內逐年依限投狀各具在職功過書校  
考第檢勘錄奏一應諸司令史及勒留官丁憂不計有  
官無官並一百日後舉追如願終喪不在舉限除丁憂  
年一考不附奏次年便許計選數赴集其丁憂人仍牒  
考功及南曹終喪者計三年憂一諸色選人使上考減



選其下考並合殿選并注令錄銓曹勘驗祇憑考功報  
檢多有差錯今請每年考功申校上考及下考勅下後  
請具單名牒門下省及申三銓關報南曹以憑勘會並  
須九月已前報畢從之

清泰二年五月尚書考功奏奉去年五月勅中外官員  
宰臣節度使已下並逐年書考僅千餘員當司人吏貧  
乏乞依三銓例當司歸司官逐月支賜紙筆糧錢勅考  
功司人吏依三銓例給與糧錢春冬衣賜諸司不得援  
例從之

周廣順二年十二月二十八日勅節文其省校考牒如  
是奏下後滿三年不請給考牒者宜令考功准先降勅  
文不在出給之限

三年三月十四日勅節文起今後諸州府更有功中考  
簿限格限申到者本判官并錄事參軍各罰五十直其  
錄事參軍仍殿一選本句押官典委本州各行科斷如  
違程限一月已上不申到者仍令尚書考功催促候供  
申到考帳依例施行所有科罰准前處分若是校考過  
時卽與次年依格奏校又勅州縣官或特勅除授或非



時省故停任員闕除官到任者緣赴任不拘期限申發考帳之時但滿一周年便與依例書校一考申省如書校時少欠月日卽與次年附帳申校不得漏落考第姓名如或有違罪本道書考官吏

顯德五年閏七月尙書考功奏奉新勅起今年正月一日後授官並以三周年爲限閏月不在其內者當司所書校內外六品已下赴選官員考第今後以一周年校成一考如欠日不計限滿三周年校成三考如考滿後未有替人在任更一周年與成第四考欠日不在計限

兼逐年月日自上已來課績功過第二考須具經考後課績不在重疊計功其末考須是具得替年月日比類升降自今年正月一日已前授官到任者准格例三十箇月書校三考今年正月一日後來授官到任者准新勅三周年爲月限每一周年書校一考閏月不在其內所有諸道州府校考申發考帳及當司校奏各依前後格勅施行應諸司諸色流外出身人等准格並須待附甲下然後與申考近年不經奏考便至參選頗啟倖門應在司見役人等自今後逐年起六月一日後正身於



所司投狀請申校勞考省司據狀卻牒本司勘會補奏年月日勅甲頭姓名見主掌案分公事牒報省司將元狀檢勘同卽與准例申校仍自此後須逐年九月已前校奏了畢不在更與隔年併書之限其考牒本無紙書寫勅例今後每年奏下逐人給省牒一紙使大張紙書及併年都給限據省校勘勅下考牒方許計考如書校之日有公事在外差出卽本司雜事須具在職功過及出外事由牒報考功不得有妨逐年考校如不與申牒其雜事令史量情科決仍殿一選如無故自不經省投

狀請奏校不在論訴之限者當司緣勅促期限慮恐校考遲違今後應合校考人請起自五月一日投狀限十日畢至七月三十日已前校奏餘依元格施行從之

兵部

後唐同光二年五月二十五日尙書兵部奏重制置收補千牛進馬事如後一進馬准舊例八員殿中省進馬四員太僕寺進馬四員千牛一十二左仗六員右仗六員准格取十三已上收補十五已上出仗各守三十五月限一准六典千牛備身及太子千牛皆取三品已上



諸司官四品清官子孫儀容端正武藝可稱者補充今請使二品三品四品清官蔭補左右僕射太子少師少傅少保御史大夫六行尚書左右常侍門下侍郎中書侍郎太子賓客太常卿宗正卿左右丞諸行侍郎秘書監國子祭酒節度統軍上將軍金吾大將軍已上並許補子爲太子千牛請使東宮三品四品清官蔭補詹事庶子請使北省二品南省一品正官蔭補侍中中書令太師太傅太保太尉司徒司空太子太師太子太傅太子太保已上並許補孫一見任兵部尚書侍郎並不得

收補子孫凡請使蔭一官祇許補一員不得重疊更使舊蔭應請使皇蔭一品不得過二十年二品三品四品不得過十年如過年限所司不在收補若是身有殘疾不在收補之限一准舊例每入閣皆須赴仗祇候如三度不到便除落名姓一應所請補千牛進馬先具蔭序品第於都省投狀候都省發狀到當司卽引過本行尚書侍郎郎中員外郎點檢年貌及勘會蔭序引問習試合格方得收補呈引過堂候過堂了始可申奏餘請准格施行從之



晉天福五年三月敕兵部禮部引人過堂之日幕次酒食會客悉宜停廢

職方

後唐天成三年閏八月敕諸道州府每於閏年合送圖經地圖今後權罷

長興三年五月二十三日尙書吏部侍郎王權奏伏見諸道州府每遇閏年准例送尙書省職方地圖者頃因多事之後諸道州府舊本雖存其閒郡邑或遷館遞曾改添增鎮戍剗造城池竊恐尙以舊規錄爲正本未專

詳勘必有差殊伏請頒下諸州其所送職方地圖各令按目下郡縣鎮戍城池水陸道路或經新舊移易者並須載之於圖其有山嶺溪湖步騎舟楫各得便於登涉者亦須備載奉敕宜令諸道州府據所管州縣先各進圖經一本並須點勘文字無令差悞所有裝寫工價並以州縣雜罰錢充不得配率人戶其閒或有古今事迹地里山川土地所宜風俗所尙皆須備載不得漏畧限至年終進納其畫圖候紙到圖經別敕處分

戶部



後唐天成三年閏八月廢戶部蠲紙四年五月尙書戶部狀申伏緣當司蠲符近奉敕令有事功可著者卽戶部奏聞又不開逐年及第進士及諸科舉人事例今據前進士趙彖乞蠲符者奉敕凡登科第皆免征徭如或雷同慮傷風化兼緣近有敕命不合更乞蠲符所宜特示明規務在勸人爲學除新敕前已給蠲符外應禮部貢院每年諸道及第人等宜令逐道審驗春關冬集不得一例差徭其及第人亦不得虛影占戶名

長興二年九月二日敕凡置營田比召浮客若取編戶

實案常規如有係稅之人宜令卻還本縣應三京諸道營田祇耕佃無主荒田及召浮客此後若敢違越其官吏及投名稅戶當行重斷

三年五月二十九日尙書戶部奏當司所管天下合貢方物於長興三年三月定到七十餘州舊例冬至後齊到正仗前點檢至元日殿前排列當司引進昨點檢今年正仗前內六十七州至其餘二十州自正月至三月方到京師其江陵府所貢胎白魚勘問本道進奏官狀稱每年臘月浥造至正仗未堪供進其餘州府未曾嚴



五代會要 卷十五  
加告諭請行敕命約束如來年正仗前貢物不齊其本  
州官典量定殿罰又棣州合進蘿磨子本州稱無本色  
折進價錢絹一疋任土作貢豈合折錢其絹價停敕江  
陵府胎白魚許於限內仗進餘依奏

應順元年正月敕諸州府籍沒田宅並屬戶部除賜功  
臣外禁請射

晉天福四年閏七月尙書戶部奏李自倫義居六世准  
敕旌表門閭當司元無令式祇先有登州義門王仲昭  
六代同居其旌表有廳事步欄前列屏樹烏頭正門閭

閭一丈二尺二柱相去一丈柱端安瓦桶黑漆號烏頭  
築雙闕一丈在烏頭之南三丈七尺夾街十有五步槐  
柳成列今舉此爲例又不載令文敕王仲昭正廳烏頭  
門等事旣非故實恐紊彝章宜從令式祇表門閭於李  
自倫所居之前量地之宜高其外門安綽楔門外左右  
各建一臺高一丈二尺廣狹方正稱臺之形坊以白泥  
四隅染赤行列樹植隨其事力同籍課役一准令文  
周廣順二年正月敕應諸處戶部營田人戶租稅課利  
除京兆府莊宅務贍軍國權監人戶兩京行從莊外其



五代會要 卷十五  
餘並割屬州縣所徵租稅課利官中祇管戶部營田舊  
徵課額其戶部營田職員一切停廢一應有客戶元佃  
係省莊田桑土舍宇便令充爲永業自立戶名仍具元  
佃桑土舍宇牛具動用實數經縣陳狀縣司給與憑由  
仍放戶下三年差遣若不願立戶名許召主卸佃不得  
有失元額租課其車牛動用屋舍樹木亦各宣賜官中  
更不管係一諸處營田戶部院及係賜人戶所納租牛  
課利其牛每頭具上率納苗課逐年都納秋夏斛斗二  
萬一千餘石更納錢鞋布稗草等其租牛緣官中係帳

不管死損歲月旣深轉益貧困所徵牛租起今年後並  
與除放所有見在牛犢並賜本戶官中永不收係一諸  
州鎮郭下及草市見管屬省店宅水磴委本處常切管  
句其徵納課利不得虧失若有人收買具見直價例申  
省仍仰本戶承認元本稅錢如是元本稅錢重大卽減  
價出賣如無稅錢亦仰量事出稅管認輸納其空閑倒  
塌店宅及空地亦准此指揮所有貨賣宅舍仍先問見  
居人若不買次問四隣不買方許眾人收買其元隨宅  
舍諸般物色亦仰隨本業貨賣其兩京城內及草市屋



五代會要 卷十五  
宅店舍不在此例宜令諸道州府准此其年九月勅京  
兆府耀州莊宅三白渠使所管莊宅宜並屬州縣其本  
務職員節級一切停廢除見管水磴及州縣鎮郭下店  
宅外應有係官桑土屋宇園林車牛動用並賜見佃人  
充本業如已有莊田自來被本務或形勢影占令出課  
利者並勒見佃人爲主依例納租條理未盡委三司區  
分仍差尙書刑部員外郎曹匪躬專往點檢割屬州縣

度支

周顯德五年閏七月度支奏當司漕運水陸行程制陸

行馬日七十里步及驢五十里車三十里水行泝流舟  
之重者泝河日三十里江四十里餘水五十里空舟泝  
河日四十里江五十里餘水六十里沿流之舟輕重同  
制河日一百五十里江一百里餘水七十里其三峽砥  
柱之類不拘此限若遇風水淺不得行者聽折半功河  
南河北河東關內等四道諸州運租庸雜物等腳每馱  
一百斤一百里一百文山阪處一百二十文車載一千  
斤九百文從黃河及潞河自幽州運至平州每十斤泝  
流十六文沿流六文餘水泝流十五文沿流五文從澧



荆等州至揚州四文其山阪險難驢少處每馱不得過一百五十文平易處不下八十文有人員處兩人分一馱其運向播黔等及涉海各在本處量定

延資庫使

梁開平三年九月以門下侍郎平章事薛貽矩兼延資庫使至乾化二年五月以門下侍郎平章事于兢兼延資庫使

五代會要卷十五

五代會要卷十六

宋太祖皇帝

溥

撰

刑部

後唐長興二年八月勅御史臺每月支錢三百千充曹司人力紙筆糧課其大理寺元支二十千刑部一同未曾支給宜於兩班罰錢及三京諸道贓罰錢內每月支錢一百千賜大理寺刑部兩司其刑部官吏不多兼使紙筆校少宜於所賜錢內三分支與一分其月二十九日勅刑部大理寺宜各置法直官兩人仍召曉法令者



充  
四年四月勅刑部大理寺御史臺奏三司官每推斷案  
牘時特與免朝恐滯推覆法官推覆時不得私行人事  
公事畢日朝參如常

晉天福三年三月詳定院奏前守晉州洪洞縣主簿盧  
粲進策伏以刑獄至重朝廷所難尙書省分職六司天  
下謂之會府諸道決獄若關人命卽刑部不合不知欲  
請諸州府凡斷大辟罪人訖逐季具有無申報刑部仍  
具錄案款事節并本判官馬步都虞候司法參軍法直

官馬步司判官名銜申聞或有案內情曲不圓刑部請  
行覆勘從之

司門

梁開平三年十月勅過所先是司門郎中員外郎出給  
今寇盜未平恐漏姦詐宜令宰臣趙光逢專判凡出給  
過所先具狀經中書點檢判下卽本司郎中據狀出給  
晉天福三年六月勅應管關令丞等宜准唐天成四年  
四月勅本司不得差補祇委關鎮使鈐轄今日已前差  
補者宜令畫時勒停訖奏聞



漢乾祐元年七月六日勅左司員外郎盧振奏請應有經過關津州府諸色人等並須於司門請給公驗令所在辨認方可放過宜依所陳頒示天下仍令司門准向來舊規合施行事件子細條舉奏聞

禮部

後唐天成三年十一月二十一日尙書禮部員外郎和凝奏臣當司管補奏齋郎今重起請如後一應請補齋郎等舊例當司祇憑都省發到狀便給補牒旋團甲申奏伏緣當司已前久無正官多是諸司權判或有投狀

多時並不團奏或有纔投文狀卽先團奏遂致積聚人數不少自同光二年二月後至今年十月已前共計二百一十人未曾團奏今臣點檢除有礙格條一官併補兩人三人并使祖蔭者落下外猶有一百七十餘人數既多虛謬不少若取年深者團奏終成積滯今欲限一月內並須正身將已前所受補牒到當司磨勘後委是正身及是嫡子年顏人材不謬者團甲引過中書門下引驗後一齊申奏一合使蔭官請自今後若遇改官須是轉品卽許更補一人明言是長子次子仍須不得



過三人其所補齋郎五品已上蔭太廟齋郎六品蔭郊社齋郎仍須是嫡子以姪繼院者卽初補時狀內言某無子今以姪某繼院爲子使蔭一應補齋郎等祇憑都省發狀便給補牒請自今後須得正身齋狀到當司比試呈驗除三省官外並引驗告勅及取保任官狀委是親子卽給補牒每年旋於八月上旬具狀解送赴南曹仍團奏時別具子細三代鄉貫使官蔭狀齊赴中書門下引驗候無差謬卽得團甲申奏仍每年祇限團甲奏一年一甲三十人以爲常式一按六典所補齋郎並試

兩小經取粗通文義者充奏補之後非久爲官若不達經書則難通吏理請自今後齋郎所投文字狀並須親書仍須念得十卷書者卽得補奏一使父皇任官蔭者並須將前任告勅呈驗仍取在朝三員清資官充保及移牒所曾任官臺省寺監勘有此官及年月日同否委無虛謬卽得補奏仍准千牛進馬例不得過十年其所使祖皇任官蔭者年月深遠難知子細今後請不許補奏從之

長興二年十月勅應千牛進馬齋郎遇有員缺據資蔭



合得者先受官者先與收補後受官者據月日次第施行如或徇私公然越次本人及官吏當行責罰仍令御史臺常加察訪

周廣順元年八月吏部南曹先爲去年冬集選人年滿室長季浦張宗義爲奏補不依年限駁放後便值兵火失墜補牒優牒申中書門下取裁欲判成選人失墜文書例出給公憑奉勅宜令所司各出給失墜文書公憑候參選日磨勘理本官選限外仍各殿兩選應乾祐元年已來及自今如有齋郎奏補後年限滿合定冬集及

改補室長時有違格條不依年限者違一年殿兩選違二年殿三選二年已上不在施行之限

祠部

後唐長興二年七月勅天下州府應有載祀典神祠破損者仰給公使錢添修

周顯德二年五月六日勅兩京諸州府每年造僧帳兩本一本申奏一本申祠部逐年四月十五日後勒諸縣取索管界寺院僧尼數目申州州司攢帳委錄事參軍本判官點檢至五月終已前文帳到京如出限不到及



漏略僧尼寺舍申奏鹵莽其本判官及錄事參軍州縣  
 官典並等第科斷今後僧尼籍帳內無名者並勒還俗  
 如有身死還俗逃亡者旋申報逐處州縣次年帳內開  
 說其餘巡禮行脚出入往來一切取便其年諸州供到  
 僧帳見存寺院  
 二千六百九十四所廢寺院凡三萬三十六見在僧  
 四萬二千四百四十四尼一萬八千七百五十六  
 五年七月勅今後僧帳每三年一造其程限准元勅施  
 行

三年十一月詔廢天下淫祠仍禁擅興祠宇如有功績  
 灼然合建置廟貌者奏聽勅裁

虞部

後唐長興元年十月國子尚書博士田敏奏請依春秋  
 藏冰殞冰之義以消陰陽憊伏之沴勅藏冰之制載在  
 前經獻廟之儀廢於近代既朝臣之特舉按典禮以宜  
 行田敏所奏祭司寒獻羔事宜依其桃弧棘矢事久不  
 行理難備創其諸侯亦宜准往制藏冰

祕書省

周顯德五年閏七月祕書省奏奉今年七月七日勅節  
 文刪集見行公事送中書門下者當省逐季准祠部牒



五作會要 卷十一  
到畫日預先牒著作局修撰祝文兼牒太常禮院詳定  
神名首尾及准太常寺牒到逐季五岳四瀆牒著作郎  
修撰祝文牒太常禮院詳定神名候太常宗正兩寺供  
到祝版及獻官名銜省司帖著楷書修寫

### 殿中省

漢乾祐三年八月殿中省奏當司儀仗車駕都洛京時  
所差至今管係逐年分番祇候執擎儀仗昨京兆府奏  
依平戶例差使伏恐忽有大禮無人供應勅殿中省執  
擎儀仗關西道色役人員地里遐遙分番勞擾宜據姓

名並還州縣今後執擎人缺別奏取裁

### 內侍省

後唐同光元年十一月以左監門衛將軍判內侍省李

紹宏兼內句紹宏在莊宗皇帝龍潛日為中門使及即位命潞州監軍張居翰與郭崇韜為樞密使以紹宏為宣徽使心常不足崇韜知之乃置內句之名凡天下錢穀簿書悉委裁決州縣供帳煩費議者非之

天成元年四月中書門下奏請廢諸道監軍使并內句  
司從之

### 太常寺



後唐長興三年正月太常卿劉岳奏先奉勅刪定鄭餘慶書儀者臣與太子賓客馬縞太常博士段顒田敏路航李居浣太常丞陳觀等同共詳定其書送納中書門下奉勅宜差左散騎常侍任贊右散騎常侍楊凝式兵部尚書梁文矩工部尚書崔居儉太子賓客裴高尚書左丞王權尚書吏部侍郎姚顓等七人與劉岳再於鄭餘慶書儀內子細檢詳除文臣起復及士庶冥婚准勅不行外應篇目一一立出元舊條件據有合定者逐件別書出今詳定式樣其不可改易者亦須具言請仍舊

施行

周顯德五年閏七月太常寺奏准勅節文刪集見行公事送中書門下者謹具如後每有四季祇應諸郊壇廟御署祝版並是牒三司起請卻於少府監請祝版差人吏部抄寫細名銜牒祕書省寫文牒閣門進署訖齋赴祠所遇鑾駕巡省准堂判於留守衙書御名祇應逐年四季諸州府祭嶽鎮海瀆祝版當司於進奏院抄寫本州細名銜具錄牒祕書省撰文書寫牒閣門進署分付本州如鑾駕巡省亦於留守衙書御名四季諸郊壇廟



案盛禮料諸般物色並是逐季計算申請牒省支給逐處請領納太廟禮料庫逐月卻於禮料庫請領逐祭分劈十數升合齋赴壇廟祇應兼旬當諸處焚奠火龍

宗正寺

周顯德五年閏七月宗正寺奏准勅節文刪集見行公事送中書門下者謹具如後見管齋郎室長逐季候大饗捧饌行禮及出給每年行事厯子見管禮料庫收貯諸司納到諸郊壇廟祠祭禮料逐月給付逐季太廟并別廟祠祭祝版當寺於少府監請領送祕書省書寫訖

卻將應奉祠祭候年滿則將齋郎室長於每年八月印發文字解送赴南曹

光祿寺

周顯德五年閏七月光祿寺奏准勅節文刪集見行公事送中書門下者謹具如後逐年四季諸郊壇廟祠祭大祠中祠小祠并朔望告廟等逐季所請禮料並牒省於諸庫務請領送納入禮料庫逐月旋具祭數請領於本庫寺封記赴祠部造饌供應四般肉醬并鹿脯省司元指揮在御廚年支制造合使升合斤兩請領供應皇



帝親拜南郊自太廟朝饗至郊壇供備并鑾駕巡幸准例城門外輶祭告天地社稷太廟各合申請禮料供應

太僕寺

周顯德五年閏七月太僕寺奏准勅節文刪集見行公事送中書門下者謹具如後諸郊壇廟祠祭昊天上帝上辛一祭無羊太社太稷皇地祇逐祭各供犢子一頭羊一口神州地祇朝日夕月百神已上四處并太廟逐祭元供犢子一頭羊一口准顯德二年八月勅皆不用犢今逐祭供羊一口黃帝青帝赤帝白帝黑帝元逐祭祇供犢

子一今亦准勅用羊一口代九宮貴神先農風雨五龍文宣王武成王逐祭各供羊一口司寒逐祭供黑羊一口先牧馬祖馬社馬步靈星中霽逐祭各供羊肉一斤半司中司命司人司祿逐祭各供羊肉六斤太廟朔望祭逐祭供羊肉七斤羊心肚肺一副鑾駕出宮城門外輶祭別供羝羊一口差寺丞一員充獻官禘饗逐祭供羊二口已上犢子寺司申省准指揮下開封府收買交付當寺其羊并肉等亦准省牒於牛羊司請領供應

大理寺



後唐長興二年八月勅今後大理寺官員宜同臺省例  
升進其法直官比禮直官任使兼御史臺每月支錢三  
百千充曹司人力紙筆糧課其大理寺先支二十千與  
臺中比類錢少宜於兩班罰錢及三京諸道贓罰錢內  
每月支錢一百千與大理刑部兩司其刑部人力不多  
所使紙筆校少仍於所賜錢內三分支與一分其月十  
一日大理卿李延範奏當寺今有要切事節謹具逐件  
如後一件寺司每奉勅旨斷案准格須委法直司據罪  
人所犯檢定法條本斷官將所犯罪名并所檢法律及

法書本卷對驗不差然後逐件於法狀上署名下法定  
斷伏見寺司案內每將法直官所檢條件法狀備錄在  
詳斷案伏准格文法直官祇合錄出科條備勘押入案  
至於引條判斷合在曹官仍不許於斷狀內載法直官  
姓名者自今已後其法狀臣欲落下留充寺司案底不  
錄在奏狀中冀免元勅法狀三重在案其本斷官仍於  
斷狀後具言臣所斷前件文案皆是將法直司所檢條  
法一周細詳認悉是罪人所犯科條或言將某色律  
條比附詳斷逐件參檢並無漏落法律及無欠少案內



事節一件格文內太和四年十二月三日刑部員外張  
諷奏大理寺官結斷刑獄准舊例自卿至司直訴事皆  
許各申所見陳論伏以所見者是消息律文附會經義  
以讞正其法非爲率胸臆之見騁章句之說以定罪名  
近者法司斷獄例皆緝綴詞句漏略律文且一罪抵法  
結斷之詞或生或死遂使刑名不定人徇其私臣請今  
後各令尋究律文具載其實以定刑辟如能引據經義  
辨析情理並任所見詳斷若非禮律所載不得妄爲判  
章出外所犯之罪一件詳刑定罪實在法律一科須是

犯人本條或取比附詳斷自今後大理寺詳斷文案祇  
得以本犯一條法律斷罪不得更將稍似格律於本條  
前後安排如是罪人合以官品減等官告贖罪之類條  
件卽許於法狀內次第區分右奉勅大理寺每有詳斷  
刑獄案牘准律須具引律令格式正文又稱准格詳獄  
一切取最後勅爲定後勅合破前格今後凡有刑獄先  
引律令格式有無正文然後檢詳後勅須是名目條件  
同卽以後勅定罪勅內無正條卽以格文定罪格內又  
無正條卽比附定刑先自後勅爲比事實無疑方得定



罪或慮律令難明錄奏取裁仍當比事平情取法直官不隱法文狀在案本斷官祇據憊狀書法定罪不得輒使文章及有徵引刑部詳覆官法直官亦准此兼自此御史臺大理寺准推斷刑獄之際刑法官及諸朝臣不得以見所推斷人罪名合使條格奏請改易刑法中或有不便於事者任其奏聞餘依李延範所奏

四年二月大理正張瑑奏曰臣伏見咸通十年二月二十九日大理少卿劉慶初奏請於法寺置議獄堂每寺丞詳斷刑獄畢集大卿二少卿二正六丞四司直八評

事十司於議獄堂參詳令依典式其法官中能辨雪冤獄迹狀尤異者二人已上者請書上下放三人四人已上者超資與官今欲望依慶初所奏法寺置議獄堂凡斷公事並集法官詳議然後連署奏聞天下諸州案牘亦望本判官與副使已下都廳會議勅法寺議獄宜且於寺卿廳內法官賞罰宜依所奏天下州府有疑者判官集議尋常案款則准法施行

晉天福五年六月二十七日大理寺申當寺自前每月公案一道除斷狀外須全寫三本內一本申奏一本送



刑部一本下本道者伏緣近年諸處公案件多寺司常慮淹延況所行斷遣案文此謂舉明條法況本道已有元推公案固不煩備錄施行今欲祇錄斷狀連勅頒宣亦不礙於規矩況刑部大理寺亦是已有具案元祇以斷覆詞降勅歸司其諸道元推司今欲乞准刑部例祇降斷狀連勅施行所貴將來免滯刑獄從之

鴻臚寺

周廣順三年八月勅漢睿陵穎陵今後係鴻臚寺管

太府寺

周顯德五年閏七月太府寺奏准勅節文刪集見行公事送中書門下者當寺見管銅斗一隻銅秤一量錄子一十隻銅升一隻銅合一隻五尺鐵度一條應斗升尺給付諸道州府及在京貨賣收係省錢到每隻省司支作料錢三百五十文依除官賣九百文八十陌秤每量支作料錢二百三十五文依除官賣六百三十文八十陌升每隻支作料錢五十文官賣一百三十五文八十陌尺每條支作料錢三十文官賣一百八十文八十陌

司農寺



周顯德五年閏七月司農寺奏奉勅節文刪集見行公事送中書門下者當寺每年季冬祠祭合供使芹韭菁葱葵菹等五件准例至過藏之時牒三司支給寺司請領藏過準備一冬供應

少府監

後唐同光三年正月勅少府監鑄造印文元屬禮部兩司互有推注及諸道使臣廣徵銅炭價錢自今後凡鑄印宜令本司限勅到五日內進呈不計諸道在京並不

得徵納銅炭價直所破物料於租庸院請領

晉開運三年二月詔少府監今後凡修制親王婚禮法物并冊文出降公主九樹華釵箱奩等宜令不得用龍鳳紅條帕

國子監

梁開平三年十二月國子監奏修建文宣王廟請率在朝及天下見任官俸錢每貫尅留一十五文

後唐天成三年正月中書門下奏伏以祭酒之資歷朝所貴爰從近代不重此官況屬聖朝方勤庶政須宏雅道以振時風望令宰臣一員兼判國子祭酒勅宜令宰



臣崔協兼判其年八月十一日宰臣兼判國子祭酒崔協奏請國子監每年祇置監生二百員候解送至十月三十日滿數爲定又請頒下諸道州府各置官學如有鄉黨備諸文行可舉者錄其事實申監司方與解送但一身就業不得影庇門戶兼太學書生亦依此例不得因此便取公牒輒免本戶差役又每年於二百人數內不繫時節有投名者先令學官考試校其學業深淺方議收補姓名勅宜依

五年正月五日國子監奏當監舊例初補監生有束修錢二千及第後光學錢一千竊緣當監諸色舉人及第後多不於監司出給光學文抄及不納光學錢祇守選限年滿便赴南曹參選南曹近年磨勘選人並不收豎監司光學文抄爲憑請今後欲准往例應諸色舉人及第後並先于監司出給光學文抄并納光學錢等各自所業等第以備當監逐年公使奉勅宜准往例自今後凡補監生須令情愿於監中修學則得給牒收補仍據所業次第逐季考試申奏如收補年深未聞藝業虛沾補牒不赴試期亦委監司具姓名申奏



清泰三年五月勅國子監每歲舉人皆自遠方來集不  
 詢解送何辨是非其附監舉人並准去年八月一日勅  
 須取本處文解如不及第者次年便許監司解送若初  
 投名未曾本處取解者初舉落第後監司勿便收補其  
 淮南江南黔蜀遠人不拘此例

周顯德元年十一月勅國子監所解送廣順三年已前  
 監生人數宜令禮部貢院收納文解其今年內新收補  
 監生並仰落下今後須是監中受業方得准令式收補  
 解送

近年有諸州府不得  
 解舉人即投監請補



五代會要卷十六

Blank space for text in the right-hand page.

五代會要卷十七

宋

王

溥

撰

王府官

後唐長興四年四月以祕書監劉贊為秦王傅前忠武軍節度判官蘇瓚為秦王友前襄州觀察支使魚崇遠為秦王府記室參軍

時言事者請為秦王置師傅上願問近臣皆以秦王名勢隆盛不敢

置議請自選擇乃降是命

致仕官

後唐長興二年八月勅應內外致仕官自此凡要出入



不在拘束之限

雜錄

後唐同光三年八月勅諸寺監人吏授官從來祇計勞考年滿起選方許離司近日以來頗隳條制到司會無考課公事向未諳詳便求薦論深為僥倖遂使故事都廢蓋由舊人不存豈唯勞逸不均兼致司局曠敗自今年除勞考滿三銓官卽許赴任非時不得奏薦如有主掌任重勞績可稱許赴司奏聞當與減選或是顯然事迹在司年深祇役不任卽許解職赴任餘依格條處分

天成四年九月勅諸司寺監凡有文簿施行奏覆司長須與逐司官員同簽署申發不得司長獨有指揮其主印官或請假差使其印須依倫次主簿不得踰越長興二年八月勅應諸司職掌人吏前後選授州縣官考滿日委本處申奏各追還司職依舊執行公事四年六月十日勅起今後諸司初除官勒留職人吏等並於省員州縣判司簿尉內除授免侵使見親公事正員及不支料錢

周顯德三年十月勅應諸司寺監今後收補職役人等



並須人材俊敏身言可採書札分明履行清謹勒本司關送吏部引驗人材校考筆札其中選者具引驗可否連所試書迹并本州府不係色役迴文及正身引送中書後吏部具夾名聞奏候勅下勒本司收補餘依前後格勅處分每年祇得一度奏補其諸司寺監舊額人數仍令所司量公事繁省於未奏補人數內酌詳增損別爲定額

試攝官

後唐天成元年十月十六日勅伏以削平區宇撫育蒸

黎頃當災歎之餘未絕瘡痍之苦緬惟邦本實繫官常苟未致於雍熙則曷寧於宵旰必在求之良吏委以親人儻或因循遂成勞擾先朝以選門旣無攝官尤多近年以來銓注無幾遂至諸道州縣悉是攝官旣無考課之規豈守廉勤之節而況多因薦託苟徇請求替罷不常迎送爲弊殘民害物熾然成風言念所聞焦勞何已宜令三司及諸道州府據見任攝官如未有正官具差攝月日錄名申奏如已後或爲公事及月限已滿乞行替移卽須具因由并選差將來攝官歷代職任姓名聞



奏替兌無得頻有替換如有內外臣僚輒行薦託當舉  
憲章

四年正月勅大理寺近爲陵臺令冒稱試銜按法以詐  
假論又據長定格選人無出身未曾任正員官使虛銜  
散試官奏受正員官及權知權判等官未得資自以諸  
事故解官並立選集限勅天下州府例是攝官或因勘  
窮遂爲詐假法書中雖云不可選條內其奈不無今日  
已前或有稱試銜者一切不問此後並宜禁止

晉開運元年十二月中書門下奏諸司寺監若無出身  
不合一例差署攝官況自前元無勅命指揮又不曾具  
名奏聞其太常寺太祝奉禮逐季祇應祠祭行事不可  
缺人其太常寺已差攝官滿五年者宜比三傳出身其  
餘諸司寺監今日已差攝官滿五年者宜比明經出身  
今旣稱已年滿者各委本司一月內具所差年月鄉貫  
三代申奏下中書追引本司差攝文牒及親公事文書  
點檢不虛奏覆勅下後方理選數仍給與優牒候合格  
日赴選如攝太常寺太祝奉禮有已滿三年已上者亦  
許一齊奏過候滿五周年准前事例施行其餘諸司寺



五代會要 卷一百一十七  
監攝未滿五周年者不在施行兼今後諸司寺監不得更差攝官其太常寺如正官數少宜許差前資判司主簿及黃衣選人充仍先具姓名申奏取裁不得充原額人數所攝一任限三周年爲滿每年與減一選候罷攝日准前給與優牒候本選合格日執優牒赴選從之三年五月勅省司差攝官員今日已前任攝滿五年者宜追驗本司差攝文牒及親公事文書并鄉貫三代點檢者與授初官起今後所司如更有闕須差攝官者可具所攝鄉貫三代奏聞

周顯德元年正月一日赦節文其諸寺監攝官如滿七周年已上應奉公事無遺闕文書灼然者並與同明經出身如不滿七周年者任逐便穩今後寺監不得以白身署攝如違本司官吏並行朝典其年十一月二十一日勅節文起今後諸處州縣官考限已滿替人未到閒宜令且守本官執行公事仍令依舊請俸不得擅離任所州府亦不得差署攝官替下如有遭憂停任身故假滿百日及非時闕官之時祇可差人承攝

六年七月二十三日勅攝官承乏或久罄于公勤因時



側揚宜特行于旌錄諸處自前應有攝官曾經五度者與一時出身仍先令所司磨勘須得任親公事文書解由分明每攝須及半年已上方得充爲任數仍令所司引驗人材及考試書判的然堪錄用者方得施行

僞官

後唐同光三年閏十二月勅初平僞蜀應僞署官員等官至太師太傅及三少并太尉司徒司空侍中中書令左右僕射已上並宜降至六尚書臨時更約高卑爲六行次第階至開府特進金紫者文班降至朝議大夫武

班降至銀青爵如是舊僞署將相已上與開國男三百戶餘並不許有封爵其有功臣名號並宜削去如檢校官至郎中員外郎兼侍御史已下如是僞署節鎮率先向化及立功效者委行營都統緣事迹獎任如刺史除停罷外有見任政績可稱者但許稱使君不得更有檢校及兼官其僞署班行正官四品已上依此降黜五品已下如不曾經本朝授官又無族望可稱者材智有聞卽許於府縣官中量材任使如無材智可錄者並宜放歸田里若西班有稱統軍上將軍者若本是功臣子孫



及將相之後並據人材高下與諸衛小將軍率府副率中郎將次第授任如是小將軍已下堪任使者委西川節度使補衙前押衙已下職所有歸降官除軍前任使外並稱前銜候續據材行任使

應順元年三月二十日勅節文如有賣官買官人等並准長興四年三月二十七日斷魏欽緒犯買官罪決重杖一頓處死勅處分其詐假官及冒名接腳等並准律文及天成元年九月十六日勅指揮

漢乾祐二年四月中書門下奏准吏部南曹鑱宿內選人中有契丹會同年號厯子解由考牒未審合各令改就天福年號爲復別有指揮奉勅應是僞命文書不在施行之限者今有緣晉朝受官契丹年給解由厯子若執格勅又慮有廢身名凡州縣幕府曾受契丹僞命者追毀文書祇取唐晉朝出身文書參選本選外仍殿五選降三資注擬凡唐晉朝諸科及第人於契丹年號內出給文書許追毀換給仍自新給年月日理選從之

御史臺

後唐同光二年三月三十日御史臺奏所除諸道節度



觀察防禦經略等使刺史縣令及諸道幕府兼諸司帶  
憲銜兼官合納光臺錢謹具本朝元納及減落錢數如  
後兼御史大夫元納三十千減外納一十五千兼御史  
中丞元納二十千減外納一十千兼侍御史元納八千  
三百減外納四千一百五十兼殿中侍御史元納一十  
一千三百減外納五千六百五十兼監察御史元納一  
十三千三百減外納六千六百五十已前臺司准本朝  
例及減落後所徵錢數分析如前應有諸道節度觀察  
使刺史經略防禦等使及諸道幕府上佐官并諸司班

行新受兼官者並合送納前件光臺憲銜禮錢今欲准  
例勒辭謝樞使官申報兼牒兵部勒告身案除准宣取  
外准例候送納光臺禮錢畢朱鈔到方可給付仍轉帖  
諸道進奏及諸州使院等准前事例申報催徵無致有  
隳舊規勅從之

周顯德五年閏七月一日御史臺申見行事件如後應  
新除節度防禦團練刺史賓幕州縣官兼帶五院憲銜  
合徵光臺禮錢如是已曾納過准舊例不徵兼御史大  
夫元徵三十千今徵六千兼御史中丞元徵二十千今



五代會要 卷十七  
徵四千兼侍御史元徵八千三百今徵一千六百六十  
兼殿中侍御史元徵一千三百今徵二千二百六十  
十兼監察御史元徵一十三千三百今徵二千六百六十

天成元年十二月十一日御史臺奏本朝舊例合行公  
事如後應諸道進奏院准本朝例各合置臺巡驅使官  
一員凡有公事並合申臺巡日逐在臺承應公事應諸  
道進奏官每四季月初及五月一日冬至并新除大夫  
中丞並合臺參伏自僞朝以來全隳舊制今准勅命條

流請准舊例施行應諸道節度觀察防禦經略團練使  
及諸州刺史新除赴任及郎幕上佐官等得替及准諸  
進奉到闕及歸本道並合廊參正衙謝見辭如遇大夫  
中丞入臺並合臺參凡有公事及到發日並合申報如  
違追勘進奏官典右僞朝已來全隳往制罕成倫理頗  
失規繩伏乞特降明勅指揮免令隳紊從之

長興三年三月勅近日累據御史臺奏陳狀訴屈人據  
狀內皆是訊鞫多時卻曉示陳狀人送道依次第論對  
及州府追到本支證本人又不到彼處恐紊規繩須行



條理宜令御史臺今後諸色人論訟稱已經州府斷遣後抑屈更不在牒本道勘逐便可據狀施行若未經州府論訴驀越陳狀可具事由勒本道進奏官差人齎牒監送本處就關連人勘斷訖奏聞

四年五月二十五日御史中丞龍敏等奏陳事如後一臺司除御史中丞隨行印及左右巡使監察使并出使印等外其御史臺印一面先准令式卽是主簿監臨近年已來緣無主簿遂至內彈御史權時主持又常隨本官出入不定伏緣臺中公事不同諸司動繫重難常虞

留滯當申奏申堂之際及牒州府之時事無輕重並使此印今准令式逐日有御史一員臺直承受制勅公文其御史臺印今後欲勒留臺中不令在外選差令史一人帖司一人同知此印凡有諸色大案印發之時准指揮諸司各置印厯一道據其事節數書在厯中卽於直官面前點檢印發其印至夜封閉俟交直轉付下次直官共議執行一御史臺事總朝綱職司天憲所管人吏色役最多上至朝堂次及班列或在京句檢公事或外地推勘稽遲監守狴牢行遣案牘或隨從出使或祠



五代會要 卷十七  
祭監臨凡有係於臺司皆須藉其人吏俾無闕事以贊國容近年以來人數極少及月限者授官出外爲官滿者追召未來人力不充公事停滯今欲於諸州使院內量事差取十人據臺中諸司闕人臨時量材填補者一其臺中令史今欲條流凡出官考滿卻來歸司者便具到日申所司繫其選限如有經年不到追召不來卽具申堂便乞除落姓名奉勅宜依凡在京百司人吏考滿歸司繫其選限亦宜令准此

周廣順二年十月勅今後凡有百姓訴論及言災沴先

訴於縣縣如不治卽訴於州州治不平訴於觀察使觀察使斷遣不當卽可詣臺省申訴如或越次訴論所司不得承接如有詆犯准律科懲

### 御史大夫

後唐天成元年六月以李琪爲特進行御史大夫自後不除

### 御史中丞

後唐天成元年十一月諸道進奏官等狀臣等今月四日中丞上事禮合至臺比期不越前規依舊傳語忽蒙



處分通出尋則再取指揮要明審的又蒙問大夫相公  
上事日如何臣等云大夫曾為宰相進奏官伏事中書  
事體之間實為舊吏若以別官除受合云傳語又兼傳  
指揮便令通出臣等出身藩府罕習朝儀拒命即恐有  
奏陳遵稟則全隳儀矩伏恐此後到臺參賀規則不定  
者勅御史臺是中朝執憲之司乃四海繩違之地凡居  
中外皆俟整齊藩侯尚展於公參邸吏豈宜於抗禮據  
觀論列可驗輕誣但以喪亂宏多紀綱隳紊霜威掃地  
風憲銷聲今則景運維新皇圖重正宜加提舉漸止澆

訛宜令御史臺凡關舊例並須舉行稍不稟承當行朝

典時盧文紀初授中丞領事于御史府諸道進奏官來  
賀文紀曰事例如何臺吏喬德威等言朝廷在長安  
日進奏官見大夫中丞如胥吏見長官之禮及偽梁將  
革命本朝微弱諸藩強據人主大臣皆且姑息邸吏時  
中丞上事邸吏雖至皆于客次傳語竟不相見自經兵  
亂便以為常文紀令臺司諭以舊儀相見據案端簡通  
名贊拜即吏輩既出怒不自勝相率于閤門求見騰口  
誼訴上問趙鳳曰進奏官比外何官鳳對曰府縣發遞  
祗候之流上曰乃吏卒耳  
安得慢吾法官乃下此勅

晉天福五年二月以御史中丞為清望正四品

侍御史

晉天福四年三月御史臺奏按六典侍御史掌糾舉百



僚推鞫獄訟居上者判臺知公廨雜事次知西推贓贖  
 三司受事次知東推理匭伏乞今後准故事施行勅宜  
 依舊制尋以尚書駕部員外郎兼侍御史知雜事劉其  
 暉為河南少尹自是無尚書郎知雜事者其  
 年五月御史臺奏尚書郎知雜事之時赴臺禮上軍巡  
 邸吏咸集公參府司兩縣皆呈印狀今後御史判雜上  
 事欲准前例從之

開運二年八月勅御史臺准前朝故事以郎中員外一  
 員兼侍御史知雜事近年停罷獨委年深御史知雜振  
 舉之司紀綱未峻宜遵故事庶協通規宜於郎署中選

清慎強幹者兼侍御史知雜事

殿中侍御史

後唐天成二年九月二日御史臺奏每遇入閣日祇一  
 員侍御史在龍墀邊祇候彈奏公事或有南班參雜失  
 儀點檢不及難於舉奏者今欲依常朝例差殿中侍御  
 史二員於鐘鼓樓位各綴供奉官班出入所輩其為糾  
 察從之

監察御史

後唐同光二年五月御史臺奏准本朝故事六察合行



職事如後吏察應吏部南北兩曹磨勘選人各具駁放  
判成人名銜牒報分察使及三銓應鑱銓注官後具前  
銜名擬報分察使點檢若有踰盜卽察使舉追本行人  
推鞫戶察應戶部司諸州戶帳貢物出給蠲符具事件  
合報察使兵察應兵部公事一一合報察使刑察應刑  
部法律赦書德音流貶量移斷罪輕重合報察使禮察  
應禮部司補轉鑄印諸祠祭料法物合報察使工察應  
工部司工役合報察使右御史臺六員監察謂之分察  
使但緣曠廢久不舉行今欲依條貫施行從之

御史臺主簿

後唐天成四年八月御史臺孔目官閻珪狀分析每大  
夫中丞奏請雜端主事等官承前隨廳罷任其主簿朱  
穎見任伏候勅裁勅諸道賓從卽隨府罷臺主簿旣爲  
正秩況入選門顯自勅恩須終考限朱穎宜仍舊官

知班

周廣順三年三月十四日殿中侍御史賈玘殿中侍御  
史劉載狀申自漢朝次每遇內殿起居臺司定左右巡  
使先入起居後於殿廷左右立定百官始入起居有失



官儀便宜彈奏者今後欲依入閣彈奏儀折署奏後宣  
徽使言所奏知通事舍人喝拜再拜訖便退如兩巡使  
自有失儀亦候班退互相彈奏

### 推事

周顯德五年閏七月一日御史臺申臺司見管四推臺  
一推臺二推殿一推殿二推臺或准勅命宣頭堂帖指  
揮送到公事并諸道州府論訴准例一人已上三院御  
史從上輪次配推兼具差定推官名銜申奏申中書門  
下如是三人已上卽本彈推勘若四推皆有公事外更

有刑獄卽差以次官推勘兼逐日輪差官吏臺直點檢

### 刑獄

### 出使

周顯德五年閏七月一日御史臺申臺司或准勅命宣  
頭委臺司差官出外推勘刑獄舊例於監察御史內從  
下差定如是特勅定名不拘此例

### 雜錄

後唐天成四年三月二十日御史臺奏臺中舊有格杖  
近年不行每有決遣公事皆於河南洛陽兩縣追借人



杖今臺中嘗有囚徒勘責若一一於兩縣追借又緣地里遙遠及候差人往來各有妨滯今臺請置常行人杖免有住滯公事從之

晉開運二年八月勅今後諸御史宜令除准式請假外不得以私故小事請假離京并除奉制命差勘公事及按察外不得以瑣細事差使出外

漢乾祐三年五月殿中侍御史竇文靖奏臺中糾彈過失舊有十六僛事節次不舉明臣訪聞朝官有便服徒步城市者既通閩籍實汚朝風勅宜令御史臺常加察

訪具以名聞當行譴逐隱而不言與之同罪

周顯德二年四月三日勅起今後應有自外新除御史未經朝謝者經過州府不得受館驛供給及所在公禮

時有庾元晟居秦雍閒拜殿中侍御史遽入秦州驛受軍州禮上知之故有是勅



五代會要卷十七

五代會要卷十八

宋

王

溥

撰

史館移置

周廣順三年九月勅入厚載門內向東橫街東地房宇  
宜令宏文館集賢院於此分劈廨署

諸司送史館事例

後唐同光二年四月史館奏本朝舊例中書并起居院  
諸司及諸道州府合錄事件報館如右時政記中書門下錄送  
起居注左右起居郎錄送兩省轉對入閣待制刑曹法官文武



兩班上封章者

各錄一本送館

天文祥變占候徵驗

司天臺逐月錄報并

每月供送

歷日一本祥瑞禮節

蕃客朝貢使至

鴻臚寺

逐季錄報并諸道合畫圖申送

四夷人役來降

表狀中書錄報

衣服貢獻物色道里遠

變改音律及新造曲調

太

近并具本國王名錄報

變改音律及新造曲調

太

軍還日并主將姓名具攻陷

州縣廢置及孝子順

刑部逐季

并樂詞牒報

法合變革斷獄新議赦書德音

具有無牒

孫義夫節婦有旌表門閭者

有水旱蟲蝗雷風霜

戶部

雷亦戶部封建天下祠廟敘封進封邑號詞

京百

司封

司長官刺史以上除授

諸色宣勅

武官兵部錄報

兩省逐月錄報

王公百官定諡

考功錄行狀并諡議

宗室任官

課績并公主出降儀制

宗正寺

刺史縣令有灼然政績

者

本州官錄申應碩德殊能高人逸士久在山野著述

文章者

本州縣不以官秩勘問

應中外官薨已請諡者

許本家各錄行

右乞宣下有司條件施行從之

長興三年二月司天臺奏奉中書門下牒令逐年申送

史館十一曜細行歷并周天行度祥變等當司舊例祇

依申星曜事件不載占言勅宜令司天臺密奏留中外

其餘凡奏歷象雲物水旱等事及諸州府或奏災祥一



五代會要 卷十八  
一並申送史館

前代史

晉天福六年二月勅有唐遠自高祖下暨明宗紀傳未分書誌咸闕今耳目相接尙可詢求若歲月寢深何由尋訪宜令戶部侍郎張昭起居郎賈緯祕書少監趙熙吏部郎中鄭受益左司員外郎李爲先等修撰唐史仍令宰臣趙瑩監修其年四月監修國史趙瑩奏奉勅同撰唐史起居郎賈緯丁憂請以刑部侍郎呂琦侍御史尹拙同修從之尋改呂琦爲戶部侍郎尹拙爲戶部員

外郎令與張昭等修唐史其年四月監修國史趙瑩奏自李朝喪亂迨五十年四海沸騰兩都淪覆今之書府百無二三臣等虔奉綸言俾令撰述褒貶或從於新意纂修須按於舊章旣闕簡編先虞漏畧今據史館所闕唐書實錄請下勅命購求況咸通中宰臣韋保衡與蔣伸皇甫燠撰武宗宣宗兩朝實錄又光化初宰臣裴贄撰僖宗懿宗兩朝實錄皆遇國朝多事或值變輿播越雖聞撰述未見流傳其韋保衡裴贄合有子孫見居職任或門生故吏曾託纂修聞此撰論諒多欣愜請下三



五代會要 卷十八  
京諸道及中外臣寮凡有將此數朝實錄詣闕進納請  
量其文武才能不拘資地除授一官如卷帙不足據數  
進納亦請不次獎酬以勸來者自會昌至天祐垂六十  
年其初李德裕平上黨著武宗伐叛之書其後康承訓  
定徐方有武寧本末之傳如此事類記述頗多請下中  
外臣寮及名儒宿學有於此六十年內撰述得傳記及  
中書銀臺史館日厯制勅冊書等不限年月多少並許  
詣闕進納如年月稍多記錄詳備請特行簡拔不限資  
序臣與張昭等所撰唐史祇敘本紀以綱帝業列傳以

述功臣十志以書刑政本紀以綱帝業者本紀之法始  
於春秋以事繫日以日繫月以月繫時以時繫年刑政  
無遺綱條必舉須憑長厯以編甲子請下司天臺自唐  
高祖武德元年戊寅至天祐元年甲子爲轉年長厯一  
道以憑編述本紀列傳以述功臣者古者衣冠之家書  
于圖籍中正清議以定品流故有家史家傳族譜族圖  
江左百家軒裳綴軌山東四姓簪組盈朝隋唐已來勳  
書王府故士族子弟多自紀世功貴載簡編以光祖考  
請下文武兩班及藩侯郡牧各敘兩代官婚名諱行業



五仁會要 卷十七  
功勳狀一本如有家譜家牒亦仰送官以憑纂序列傳  
十志以書刑政者五禮之書代有沿革至開元刊定方  
始備儀洎寶應以來典章漸缺其謁款郊廟冊拜王公  
攝事相儀之文車輅服章之數請下太常禮院自天寶  
以後至明宗朝以來五禮儀注朝廷行事或異舊章出  
處增損節文一一備錄以憑撰述禮志四縣之樂不異  
前文八佾之容或殊往代隋唐以來樂無夷夏乃有文  
舞武舞之制坐部立部之名天寶之初雲韶大備天寶  
之後音律漸衰郊廟殿廷舊章斯缺及咸秦蕩覆鍾石

淪亡龍紀反正之年有司特鑄懸樂旋宮之義徒有其  
文請下太常寺其四懸二舞增損始自何朝及諸廟樂  
章舞名開元十部興廢本末一一按錄以憑撰集樂志  
刑名之制代有輕重隋唐以來疏爲律令累朝繼有制  
勅相次增益舊條格律之文未能盡一請下大理寺自  
著律令以來後勅入格條者及會昌以來所斷疑獄一  
一關報以憑撰述刑法志律歷五行天文災異史書實  
錄前代具書自唐季亂離簡編淪落太史所奏不載冊  
書請下司天臺自會昌已來天文變異五行休咎歷法



更改更據朝代年月一一條錄以憑撰集天文律歷五行等志唐初定官品令三公三師爲第一品尙書令僕射爲第二品兩省御史臺寺監長官六尙書爲第三品自定令以後官品繼升比諸令文前後同異又有兼攝檢校之例資授冊拜之文軍容或盛於朝儀使務漸侵於省局以此官無定令位以賞功臺府之權隨時輕重求諸官志前代無聞請下御史臺自定令以後文武兩班品秩升降及府名使額寺署廢置官名更改一一具析以憑撰述職官志唐初守邊則有都督總管之號開

元命將則有節度按察之名故四塞之內刺史多沒于戎夷九牧之中乘寵遂邀於旄鉞山河異制名額實繁請下兵部職方自開元已來山河地里使名軍額州縣之廢置一一條列以憑撰述郡國志唐初以降迄于開元圖書大備歷朝纂述卷帙實繁若不統而論之何彰文雅之盛請下祕書省自唐以來古今典籍經史子集元撰人名氏四部大數報館以憑撰述經籍志右所陳條例如前請下所司從之其月起居郎賈緯奏曰伏以唐高祖至代宗已有紀傳德宗至文宗亦存實錄武宗



至濟陰廢帝凡六代唯有武宗實錄一卷餘皆闕略臣  
今搜訪遺文及耆舊傳說編成六十五卷目爲唐朝補  
遺錄以備將來史官條述至開運二年六月史館上新  
修前朝李氏書紀志列傳其二伯二十卷並目錄一卷  
都計二十帙賜監修宰臣劉昫修史官張昭遠直館王  
伸等繒綵銀器各有差

修國史

後唐天成三年十二月史館奏據左補闕張昭狀嘗讀  
國書伏見懿祖昭烈皇帝自元和之初獻祖文景皇帝

於太和之際立功王室陳力國朝太祖武皇帝自咸通  
後來勤王戮力翦平多難頻立大功三換節旄再安京  
國莊宗皇帝終平大憝奄有中原儻闕編修遂成湮墜  
伏請與當館修撰參序條綱撰太祖莊宗實錄者伏見  
前代史館歸於著作國初分撰五代史方委大臣監修  
自大厯後來始奏兩員修撰當時選任皆取良能一代  
之書便成于手其後源流失緒波蕩不還冒當修撰之  
名曷揚褒貶之職及乎編修大典卽云別訪通才況當  
館職在編修合令撰述勅宜依



四年七月監修國史趙鳳奏當館奉勅修懿祖獻祖太祖莊宗四帝實錄自今年六月一日起手旋具進呈伏以凡關纂述務合品題承乾御宇之君行事方云實錄追尊冊號之帝約文祇可紀年所修前件史書今欲自莊宗一朝名爲實錄其太祖已上並目爲紀年錄從之其年十一月史館上新修懿祖獻祖太祖紀年錄共二十卷莊宗實錄三十卷監修宰臣趙鳳修撰張昭遠呂咸休各賜繪綵銀器等

應順元年閏正月平章事兼修國史李愚與脩撰判館事張昭遠等進新修唐功臣列傳三十卷  
清泰三年二月門下侍郎平章事監修國史姚顛上明宗實錄三十卷同修撰官中書舍人張昭遠李祥直館左拾遺吳承範右拾遺楊昭儉等各頒賚有差  
漢乾祐二年二月勅左諫議大夫史館修撰賈緯左拾遺直史館王伸宜合同修高祖實錄仍令宰臣蘇逢吉監修至其年十月修成實錄二十卷上之其年十二月勅宜令監修國史蘇逢吉與史館修撰賈緯并竇儼王伸等修晉朝實錄呈進從宰臣竇貞固奏請也



周廣順元年七月史館新修晉高祖實錄三十卷少帝實錄二十卷上之

顯德三年十二月勅太祖實錄并梁均帝唐清泰二主實錄宜差兵部尚書張昭脩其同修修撰官委張昭定名奏請至四年正月兵部尚書張昭奏奉勅編修太祖實錄及梁唐二末主實錄今請令國子祭酒尹拙太子詹事劉溫叟同編修伏緣漢隱帝君臨太祖之前其歷試之績並在漢隱帝朝內請先修隱帝實錄又梁末主之上右郢王友珪篡弑居位未有紀錄請依宋書劉劭

例書為元兇友珪其末帝請依古義書曰後梁實錄又唐末主之前有應順帝在位四月出奔亦未編紀請書為前廢帝清泰主為後廢帝其書並為實錄從之五年六月兵部尚書張昭遠等修太祖實錄三十卷成上之

修史官

後唐長興四年正月十一日史館奏當館承前修史事例應合編錄文書分配在館脩撰直館官員逐人紀述內修撰一員充判館事自除修撰外應館中著述及諸



五倫會要 卷十一  
色公事都專主掌監脩宰臣通判前修撰直館等其間  
勤恪者著述不閑怠惰者自因循度日祇藉館中敷歷  
以資身事進趨或別除官或因出使便將自己分合撰  
史籍送付後人後人效尤依前懈惰積疊不了公事爲  
弊滋多須設規程庶無曠敗謹具起請如左自判館修  
撰已下見充職任及此後充館請以二周年爲限據在  
職館中文書繁簡逐季分配纂修如月未滿公事未闕  
卽當館給與公憑仍旋申中書門下請別商量其職限  
內遇本官本省署有遞遷請不妨其序進卽請令依前

充職終其月限並請不許未終職限特更除官如職限  
滿有公事未了不計幾月請不別與除官及差使并與  
遞遷本官其曠職甚者仍請量事殿罰如據所分配文  
書修撰外別能採訪得無后功臣事實及諸色合編集  
事著撰得史傳堪入國史者請量其課績別加酬獎如  
當館於職限滿官員中籍令充職者則旋具奏聞乞就  
加陞陟應此日已前曾充館職配過文書除丁憂官員  
則請與均分代修撰其未了別除官者所欠文書不計  
多少並與令本官修撰速須了畢其今日已前曠惰之



過特乞矜容起今後若更將已前未了公事遷延不速  
 修撰了者則別具奏聞仰候聖裁右奉勅宜依仍付所  
 司其年七月以著作佐郎尹拙為左拾遺直史館王慎  
 徽為右拾遺直史館從監修宰臣李愚奏也  
故事以本官直者皆為畿縣尉今諫官直館自拙等始也

史館雜錄

後唐同光二年四月史館司四庫書自廣明年後散失  
 伏乞許人進納仍中書門下降勅條件勅進書官納到  
 四百卷已下皆成部帙不是重疊及紙墨書寫精細已

在選門未合格人每一百卷與減一選無選減者注官  
 日優與處分無官者納書及三百卷特授試銜  
 天成二年八月起居郎趙熙奏今後凡公事及詔書奏  
 對應不到中書者伏乞委內臣一人旋具抄錄月終關  
 送史館勅宜令樞密院學士月終錄送  
 長興二年三月二十八日史館奏當館應諸處及諸關  
 送到合編錄公事外伏准舊例國朝有時政記并起居  
 注並合送館以備纂修近代以來缺行此事祇以每遇  
 入閣兼內殿起居朝臣待制轉對公事逐人抄送當館



五代會要 卷十八  
如是顯有頒行逐司關報到者旋逐件於日曆一一收  
豎其有直下所司并不行之事當館無由得知若祇憑  
本官供到所奏狀本未免簡編不備本末難窮者前件  
待制轉對公事等除顯有頒行關送到館外應有直下  
所司及不行未行之事伏乞宣付當館旋依次第編錄  
其時政記起居注并內廷逐日合書日曆亦乞相次施  
行奉勅朝臣起居入閣奏對公事奏覆後宣付史館宜  
依其時政記起居注候別勅處分其年十一月四日史  
館奏當館昨爲大中已來迄於天祐四朝實錄尙未纂

修尋具奏聞謹行購募勅命雖頒於數月圖書未貢於  
一編蓋以北土州城久罹兵火遂成滅絕難可訪求竊  
恐歲月漸深耳目不接長爲闕典過在攸司伏念江表  
列藩湖南奧壤至於閩越方屬勳賢戈鋌自擾於中原  
屏翰悉全於外府固多奇士富有羣書其兩浙福建湖  
廣伏乞特降詔旨委各於本道採訪宣宗懿宗僖宗昭  
宗以上四朝野史及逐朝日曆除目銀臺事宜內外制  
詞百司沿革簿籍不限卷數據有者抄錄進上若民間  
收得或隱士撰成卽令各列姓名請議爵賞從之



五什會要 卷之八 三  
四年正月十一日史館奏當館先奉勅修撰功臣列傳  
元奏數九十二人館司分配見在館官員修撰其閒亦  
有不是中興以來功臣但據姓名便且分配修撰將求  
允當須在品量其閒若實是功臣中興社稷者須校其  
功勳大小德業輕重大第纂修排列先後今請應不是  
中興以來功臣汎將行狀送館者若其閒事有與正史  
實錄列傳內事相連絡者則請令附在紀傳內簡畧書  
出其無功於國無德於人但述履行身名或錄小才末  
伎儻無可以垂訓者並請不在編修之限伏自有史傳

以來歷代咸有著述皆存定制不可更張如前漢止述  
蕭曹絳灌之流後漢但書寇鄧耿賈之列並同翼戴咸  
共匡扶爵號功臣先爲列傳其餘宗室外戚文苑儒林  
游俠逸人循吏酷吏之屬名目甚眾各有篇題並隨其  
次第撰述其大惡大善之人有善若周孔夷齊惡若敦  
玄莽卓亦各特爲著撰不附傳紀編修或爲世家或爲  
列傳蓋欲取監前代垂則後人不可雷同請令區別其  
功臣未納到行狀者館司見更催促候到即便分配修  
撰大凡行狀皆是門人故吏敘述多有虛飾文華今請



五代會要 卷十八  
此後所納行狀並須直書功業不得虛文飾詞其已納到行狀合著撰者仍請委修撰官略其浮辭採其實事從之

應順元年正月勅今後三館所闕書並訪本添寫其進書官權宜停罷

晉天福四年十一月史館奏按唐長壽二年右丞姚璹奏帝王謨訓不可闕文其仗下所言軍國政事令宰臣一人撰錄號時政記至唐明宗朝又委端明殿學士撰錄逐季送付史館伏乞遵行者宜令宰臣一員撰述

周顯德元年十月監修國史宰臣李穀奏今之左右起居郎即古之左右史也唐文宗朝命其官執筆立於殿堦螭頭之下以紀政事後則明宗朝命端明殿及樞密院直學士皆輪修日歷旋送史館以備纂修降及近朝此事皆廢今後欲望以諮詢之事裁制之規別命近臣旋具抄錄每當修撰日歷即令封送史臣從之因命樞密院直學士起今後於樞密使處逐月抄錄事件送付史館

二年十二月詔曰史館所少書籍宜令本館諸處求訪



補填如有收藏書籍之家並許進納其進書人據部帙多少等第各與恩澤如卷帙少者量給資帛如館內已有之書不在進納之限仍委中書門下於朝官中選差三十人據見在書各求真本校勘刊正舛誤仍於逐卷後署校勘官姓名宜令館司逐月具功課申中書門下

### 宏文館

後唐同光三年七月宏文館奏請依六典故事改宏文館爲崇文館勅崇文館比與宏文館並置今請改稱頗協舊典從之

時樞密院樞密使郭崇韜亡父名宏豆盧革希意奏改之故有宏文並置之言

### 集賢院

後唐應順元年閏正月集賢院奏准勅書創修凌煙閣又奉正月二十二日詔問閣高下等級謹案凌煙閣都長安時元在西內三清殿側畫像皆北向閣有中隔隔內面北寫功高宰輔南面寫功高諸侯王隔外面次第圖畫功臣題贊自西京傾陷四十餘年舊日主掌官吏及畫像工人淪喪集賢院元管寫真官畫真官人數不少自遷都洛京並皆省廢今將起閣特請先定佐命功臣人數下翰林院預令寫真本及下將作八作與畫工



相度閒架修葺緣院內有先寫真官沈居隱畫真官王武瓊二人身死即日無人應用伏候勅旨勅集賢御書院復置寫真官畫真官各一員餘依所奏

五代會要卷十八

五代會要卷十九

宋

王

溥

撰

留守

晉天福七年九月敕留守之任委寄非輕凡降絲綸宜

同將相今後除留守宜降麻制

留守降麻自安彥威始也

開封府

梁開平元年四月二十三日敕升汴州為東京置開封府以開封浚儀兩縣為赤縣其餘屬縣為畿縣是月敕東京諸城門宜賜名額宋門為觀化門尉氏門為高明



門鄭門爲開明門梁門爲乾象門酸棗門爲興和門封邱門爲含曜門曹門爲建陽門

後唐同光元年十二月復降開封府爲宣武軍節度至天成四年五月敕汴州宮殿並去鴟吻賜本道節度使爲治所其衙署諸門園亭名額並廢

晉天福三年十月敕汴州宜升爲東京置開封府以開封浚儀兩縣復爲赤縣其餘屬縣爲畿縣應舊制開封府時管屬縣分並可仍舊其月敕東京諸城門宜署名額南面尉氏門爲薰風門西面鄭門爲金義門梁門爲

乾明門北面酸棗門爲玄化門封邱門爲宣陽門東面曹門爲迎春門宋門爲仁和門其牌額宜令翰林院書勒呈進

周顯德五年五月賜東京城門名額南面三門曰朱明

門景風門畏景門西面二門曰迎秋門肅政門北面三

門曰玄德門長景門愛景門東面二門曰賓賓門延春

門又以大內舊匾賓天門爲通苑門

河南府

後唐同光三年三月詳定院奏近升魏州爲東京臣檢



故事須先定兩府未審依舊以京兆及河南為兩府太原興唐為次府為復以興王之地別定府名敕故事雍州為西京洛州為東都太原府在兩府之次近以中興大業以魏州為東京興唐府權名東都為洛京今後依舊以洛京為東都魏州改為鄴都興唐府與北都太原府並為次府

長興三年四月中書門下奏本朝都長安以京兆府為上今都洛陽請以河南府為上從之  
晉天福三年十月敕改東都為西京

京兆府

梁開平元年四月改京兆府為大安府長安縣為大安縣萬年縣為大年縣仍置佑國軍節度使額始命韓建為佑國軍

節度使至二年五月改佑國軍為永平軍

後唐同光元年十二月廢永平軍額復為西京京兆府

大安縣為長安縣大年縣為萬年縣

晉天福七年十月敕改西京為晉昌軍留守為節度觀

察使仍依舊為京兆府在七府之上

漢乾祐元年三月改晉昌軍為永興軍



周廣順元年六月降京兆府同五府長安萬年縣為次赤縣

大名府

後唐同光元年四月升魏州為東京都督府曰興唐府元城縣為興唐縣貴鄉縣為廣晉縣至三年三月改為鄴都興唐為次府

天成四年五月敕先升魏州為鄴都有留守王城使及宮殿諸門園亭名額並廢

晉天福二年九月改興唐府為廣晉府興唐縣為廣晉

縣

三年十一月敕魏州廣晉府復升為鄴都置留守廣晉元城兩縣為赤縣其餘屬縣為畿縣

七年四月敕鄴都諸門宜賜名額羅城南墉門為廣運

門觀音門為金明門橙槽門為清景門冠氏門為永芳

門朝城門為景風門大城南門為昭明門觀音門為廣

義門北河門為靖安門魏縣門為膺福門冠氏門為迎

春門朝城門為興仁門上斗門為延清門下斗門為適

遠門



開運二年四月敕鄴都依舊爲天雄軍節度管內觀察處置等使鄴都留守廣晉尹

漢乾祐元年三月改廣晉府爲大名府廣晉縣爲大名縣

周廣順元年六月以大名府元城縣爲赤縣

顯德元年正月廢鄴都留守依舊爲天雄軍大名府在京兆府之下其屬縣地望官吏品秩並同京兆府

諸府

後唐長興三年四月中書門下奏案十道圖以關內道

爲上遂以鳳翔爲首河中成都江陵興元爲次中興初升魏州爲興唐府鎮州爲真定府皆是創業興王之地請升二府於五府之上合爲七府仍以興唐爲首真定鳳翔成都江陵興元爲次從之

都督府

梁貞明六年閏六月敕宋州升爲大都督府其年八月敕升福州爲大都督府

後唐長興三年四月中書門下奏天下舊有八大都督府按十道圖以靈州爲首陝幽楊潞鎮徐等州爲次其



五代會要 卷十九 五  
魏鎮已升爲七府兼具員內越杭福潭等州亦相次升  
爲都督府望以十大都督府爲額仍據升降次第以陝  
爲首餘依舊制從之

周廣順三年正月四日敕頃者淮海陸梁舉干戈而入  
寇湖湘覆沒致黎庶之倒懸惟彼武陵素稱雄鎮連營  
比屋皆懷勇烈之心戮力協謀盡復江山之境宜降褒  
崇之命以升忠義之邦俾列大藩永率南夏其朗州宜  
升爲大都督府在潭桂之上

刺史

後唐同光二年三月中書門下奏刺史縣令有政績尤  
異爲眾所知或招復戶口能增加賦稅者或辨雪冤獄  
能全人命者或去害物之積弊立利世之新規有益時  
政爲眾所推者卽仰本處逐件分明聞奏當議獎擢或  
在任貪狠誅戮生靈公事不治爲政怠惰亦加懲罰其  
州縣官任滿三考卽具關申送吏部格式候敕除銓注  
其本道不得差攝官替正授者從之

天成元年十二月十九日敕尙書吏部侍郎裴皞所請  
刺史三考方可替移免有迎送之勞若非歲月積深無



以彰明臧否自此到任後政績有聞卽當就加渥澤如或爲理乖謬不計月限便議替除

三年三月敕刺史以二十五月爲限仍以到任日爲數四年六月左散騎常侍蕭希甫奏請條流縣令凡死罪已下得專之刺史部內有犯死罪一人得專之觀察使部內有犯死罪五人已下得專之敕刺史旣爲屬部安可自專案牘旣成須申廉使餘依所奏

應順元年三月二十日敕刺史縣令丞尉得替自今後如是見任官將已分錢物資送得替人卽勿論其或率

斂吏民以受所監臨財物論加一等如以威刑率斂以枉法論其去任受財人減二等

周廣順二年八月敕今後刺史縣令顯有政能觀察使審詳事狀聞奏朝廷當議獎擢百姓僧道不得舉請一切止絕

縣令上

錄事參軍附

梁開平四年四月敕天下諸州鎮使官秩無高卑在縣令之下

乾化二年三月詔曰夫隆興邦國必本於人民惠養疲



五代會要 卷十九  
羸尤資於令長苟選求之踰濫固撫理之乖違如聞吏  
部擬官中書除授或緣親舊所請或爲勢要所干姑徇  
私情靡求才實念茲蠹弊宜舉條章今後應中書用人  
及吏部注擬並宜省藩身之才業驗爲政之否臧必有  
可觀方可任用如或尙行請說猶假貨財其所司人吏  
必加推窮重加懲斷

後唐天成元年八月敕中書先條奏州縣令錄正衙謝  
後合趨內殿謝辭者如令錄是除授宜令給事中引對  
如是指授者准舊例委三銓尙書侍郎各自引對仍須

前一日閣門進狀

二年九月十九日敕近聞藩鎮幕職內或有帶錄事參  
軍兼鄴都管內諸州錄事參軍從前並兼防禦判官設  
官分職激濁揚清若網在綱各司其局督郵從事兼處  
尤難沒階則賓主之道虧下榻則軍州之禮失須從改  
革式振紀綱宜令今後諸州府錄事參軍不得兼職如  
或才堪佐幕節度使須具聞奏不得兼錄事參軍鄴都  
管內刺史州不合有防禦判官之職今後改爲軍事判  
官如刺史帶防禦團練使額卽得奏署防禦團練判官



仍不得兼錄事參軍如此則珠履玳簪全歸客禮提綱振領不紊公途仍付所司

三年二月二十三日中書奏應天下縣令逐年夏秋兩稅徵科公事伏以縣令之職徵賦爲先若違限逋懸自有罰責如及期了畢不謂功勞況今無彊名之科徭絕虛係之稅額百姓據見苗輸納官中有指艱程期蓋緣每及徵科事歸煩擾未容輸納已切催驅州郡則推勸吏人縣邑則禁繫人戶雖云提舉責在徵求動涉旬時固須妨事縱及期限倍困黎民自今後請祇委主簿縣

令句當不得更置監徵每一州之中止限畢日委錄事參軍磨勘取最後逋欠縣分具令佐名銜申三司使舉奏明行責罰其所欠稅額如是本道長吏及判官衙內節級并形勢莊田不伏縣司徵督者縣令卽須自經本州論列如依前不納便可直申三司責罰之時以定輕重其縣令到官之初須准近敕交割戶口帳籍至受替之時比較多少如或增多卽量加酬獎若致逋竄則別示科刑所冀賞罰不涉於過差公務率歸於修舉其本判官都孔目官糧料使等職固不在親入公事止於提



五仁會要 卷十九 州  
舉每至徵科之日皆須一例獎勵或有徵督逋縣令佐獨當之伏請今後凡是徵科畢日比較功過只歸令佐如是一郡之內諸縣皆及期程公事修舉其錄事參軍亦請量加甄獎如管內諸縣併有闕遺其錄事參軍亦請量加責罰從之其年八月二十五日及十月十五日敕條流公事數內一件縣令化洽一同位居百里在專勤課撫育疲羸苟或因循是孤委任宜令隨處州府長吏逐縣每年考課如增添得戶稅最多者具名申奏與加章服酬獎如稍酷虐輒恣誅求減落稅額者並具奏

聞當行朝典其縣令仍勒州司批給解由厯子之時具初到任所交得戶口至得替增減數額分時批鑿將來除官及參選委中書門下併銓曹磨勘宜令三京及諸道州府准此

四年五月五日戶部奏三京鄴都諸州府逐年所徵夏秋稅租兼鹽麴折徵諸般錢穀先定格流如後一若限滿後十分中係欠三分已上者本判官罰五十直錄事參軍罰七十直本曹官罰五十直縣令罰一百直勒停簿尉罰七十直移攝閒官州縣押司錄事本典及鄉里



正孔目書手等各徒二年仍配重役本孔目句押官典杖七十都孔目官句押官杖六十並退職衙前收管一若限滿後十分中係欠二分者本判官罰三十直錄事參軍罰五十直本曹官罰四十直縣令罰七十直移攝閒官簿尉罰五十直州縣押司錄事本典及鄉里正孔目書手等杖八十本孔目官句押官典杖六十都孔目官句押官笞五十一限滿後十分中只欠一分已下者本判官罰二十直錄事參軍罰三十直本曹官罰二十直縣令罰五十直簿尉罰四十直州縣押司錄事本典

及鄉里正孔目書手等杖七十本孔目句押官典笞五十都孔目句押官各罰五十直以上所立條件若是本判官錄事參軍本曹官孔目句押官典等卽取一州都徵額上比較其縣令簿尉及典押以下卽將本縣欠數比較一所徵夏秋兩稅依省限了絕者本判官典申奏改轉官資錄事參軍縣令申奏與量留一年或界分已滿去卽轉兼官如一任之內稅賦不牽卽奏加章服若是攝官亦委本處長吏更令攝任一年如更立勞能具狀申省以憑申奏必降真命本曹判司簿尉卽申奏請



減兩選或一任之內稅租總了絕或是攝官委逐處申  
省點勘聞奏別行獎酬州府都孔目官句押官本孔目  
句押官典等以軍職轉選其都孔目官句押官如已至  
押衙職名或舊有官資亦議申奏獎酬州司并逐縣徵  
科典押每處與賞錢三十貫均勻分俵

長興元年七月敕訪聞諸道州府縣官自徇虛名不惜  
人戶皆於省限前行帖催驅須令人戶貴買充納此後  
徵科事辦亦不酬勞本處不得申奏如違限稽慢卽准  
條流責罰如添得廩宇招得流民無害於公私者當以

名聞特行恩獎

二年八月二十三日諸道奏薦州縣官前銜內有賜紫  
金魚袋者奉長興元年九月十七日敕州縣官若循常  
例十六考方得敘緋倘或已佩金章固難卻爲令錄必  
若藉其才器則可別任職資須協通規免踰定制宜令  
今後諸道州府不得以著紫官員奏薦爲州縣官者奉  
敕文資官階銜內已有金紫尙不許卻爲州縣官其武  
職銀青階銜亦宜條理宜令諸道州府自此詳文資賜  
紫例不得更以帶武職銀青階銜奏薦爲州縣官員仍



付所司

五代會要卷十九

五代會要卷十九

縣令下

錄事參軍附

晉天福五年六月二十日詳定院奏准刑法統類大中

二年正月三日勅天下州府官吏犯賊皆遞相蒙比不

肯發明縱有申聞百無一二自今後管內縣令有犯賊

事發州府不舉者連坐錄事參軍錄事參軍有犯賊事

發刺史不舉者連坐刺史刺史有賊犯事發觀察使不

舉者連坐廉使又准大中二年二月十七日刑部起請



五什會要 卷二十一  
今後縣令有贓犯錄事參軍不舉錄事參軍有贓犯刺  
史不舉刺史有贓犯觀察使不舉其所司奏聽勅旨臣  
等參詳設縣司本典知情並同罪告事人放三年租稅  
差徭仍將放免數免卻配蓋藏罪其錄事參軍不舉者  
請減縣令所犯罪二等勅起今後如有縣令犯贓錄事  
參軍知而不舉者宜准勅文處分不知者不在此限  
八年三月十八日勅諸道州府令佐在任招攜戶口比  
初到任交領數目外如出得百戶以上量添得租稅者  
縣令加一階主簿減一選出二百戶以上及添得租稅

者縣令加兩階主簿減兩選出三百戶以上及添得租  
稅者縣令加兩階減兩選別與轉官主簿加兩階減一  
選出四百戶至五百戶以上及添得租稅者縣令加朝  
散大夫階超轉官資罷任後許非時參選仍錄名送中  
書如已授朝散大夫及已出選門者即別議獎勵主簿  
加三階其出剩不及一百戶者據戶口及添租稅數縣  
令加一階參選日超一資注官主簿加一階如是一鄉  
收到三十或五十戶以上一村收到三戶五戶以上者  
其本鄉村節級等與免本戶二年諸雜差使科配如是



一鄉收到一百戶以上一村收到十戶以上本鄉村節級等與免本戶三年諸雜差徭如願且充節級所由未得差替如願歸農便與免放仍仰本縣准勅分明給與憑據自災沴已來戶口流散如歸業者切在撫安其浮寄人戶有桑土者仍收爲正戶其歸業戶天福五年已前逃移者放一年夏秋租稅并二年諸雜差遣天福七年已前逃移者放一年夏秋一半租稅并放一年雜差遣其勸收戶如先有租稅卽依元額輸納如元無租稅卽據所營地畝且收半稅并放二年差徭如鄉村妄勸

戶及坐家破逃亡者許人糾告勘責不虛其本府與鄉村所由各決脊杖八十刺面配本處牢城執役縣司本典知情並同罪告事人放三年租稅差徭仍將放免數卻配蓋藏勸戶及坐家破逃戶本鄉所由均分輸納今後天下州縣所收新添戶口租稅限十二月二十日以前申送戶部點檢如違限本處判官錄事參軍罰五十直仍削一級孔目官勾押官本案人吏杖七十降一資周廣順元年二月勅今後應諸道州府錄事參軍判司縣令主簿等宜令本州府以到任月日旋具申奏及報



吏部此後中書及銓司以到任月日用闕永爲定制其見在州縣官限勅到卽便具先到月日一齊分申及報吏部其有諸色事故及丁憂并請假十旬滿闕亦仰旋具申奏兼報吏部其新授官准令式給程限外如不到任參上致本處無憑申奏到任月日便仰吏部同違程不上收闕使用其諸色見闕亦不得差官權攝輒便隱留如違勅條罪在本判官錄事參軍孔目官以下其年八月勅起今後秋夏徵賦省限滿後十分係欠三分者縣令主簿罰一百直勒停錄事參軍本曹官罰七十直

殿兩選孔目官罰七十直降職次本孔目官句押官典決停本判官罰七十直若係欠三分以上奏取進止係欠三分以下者等第科斷殿罰其州縣徵科節級所由委本州重行決責其本判官錄事參軍本曹官孔目句押官典卽取一州上比較縣令主簿卽取本縣都徵上比較分數應州縣令錄佐官在任徵科依限了畢者至參選日四選已上者減一選不及四選者卽與轉官其年九月勅應州縣官所招添到戶口課績自今日已前罷任者並准晉天福八年三月十日勅施行其漢乾祐



五代會要 卷二十一  
三年七月二十五日勅不行起今後罷任縣令主簿招  
添到戶口其一千戶以下縣每增添滿二百戶者減一  
選三千戶以下縣每三百戶減一選其四千戶以下縣  
每四百戶減一選萬戶以下縣每五百戶減一選并所  
有增添戶口及租稅並須分明於厯子解由內錄都數  
若是減及三選以上更有增添及戶數者縣令與改服  
色已賜緋者與轉官其主簿與加階轉官  
顯德五年十月詔淮南諸縣令仍舊兼知鎮事從江南  
之舊制也

簿尉

後唐長興四年五月勅諸道馬步判官不得差攝官如  
闕人須於前資正官判司簿尉中選性行平允者補授  
中外加減官

梁開平元年四月勅開封府錄事參軍及六曹掾屬宜  
各置一員兩畿赤縣置令簿尉各一員

二年十月省諸道州府六曹掾屬存戶曹參軍一員通  
判六曹

後唐同光元年十一月中書門下奏諸寺監各請只置



五仁會要 卷二十一  
大卿監少卿監祭酒司業各一員博士兩員其餘官屬  
並請權停唯太常寺事關大禮大理寺事關刑法除太  
常博士外許更置丞一員其王府及東宮官屬司天五  
官正奉御之類凡不急司存並請未議除授其諸司郎  
中員外郎應有雙曹處且置一員左右散騎常侍諫議  
大夫給事中起居郎起居舍人補闕拾遺各置一半三  
院御史仍委御史中丞條理申奏即日停罷朝官仍各  
錄名銜具罷任月日留在中書候見任滿二十五日並  
據資品卻與除官從之

二年三月勅其先減省員官除已別授官外左散騎常  
侍李文矩等三十人宜卻復舊官太子詹事石戩等五  
人宜以本官致仕將作少監岑保嗣等一十四人候續  
勅處分其年四月三銓奏准本朝故事州府官員府有  
司錄參軍外置工曹倉曹戶曹法曹兵曹士曹六員州  
有錄事參軍外亦置六曹縣置令丞主簿各一員尉三  
員分判公事自後除兩京外都督府及諸州各置戶曹  
一員餘四員並省縣置令主簿各一員丞尉並省除合  
格選人外有郊天行事人數倍多況州官事簡掾曹請



依舊只置兩員縣局務繁請添佐官一員其閒有尉無簿者請添置主簿一員其赤縣次赤縣畿縣次畿縣並准此除四京外其判司只置司戶司法兩員從之

四年三月勅三川涇鳳秦隴等州縣官置數目絕多其上佐官自少尹以下依本朝舊制各具在任員闕申奏其州准近勅置錄事參軍司戶參軍各一員縣置縣令主簿各一員外錄事官並停其除替選任一准三銓常

式時初平偽蜀故也

周顯德五年十二月勅兩京五府少尹司錄參軍先各

置兩員今後只置一員六曹判司內只置戶曹法曹各一員其餘曹官及諸州觀察支使兩蕃判官並宜省廢

量戶口定州縣等第

周廣順三年十一月勅天下縣邑素有等差年代既深增損不一其中有戶口雖眾地望則卑地望雖高戶口至少每至調集不便銓衡宜立成規庶協公共應天下州府及縣除赤縣畿縣次赤次畿外其餘三千戶以上為望縣二千戶以上為緊縣一千戶以上為上縣五百戶以上為中縣不滿五百戶為中下縣選人資敘合入



下縣者許入中下縣宜令所司據今年天下縣戶口數定望緊上中下次第聞奏吏部格式據戶部今年諸州府所管縣戶數目合定為望縣者六十四緊縣七十上縣一百二十四中縣六十五下縣九十七欲依所定移報銓曹從之

州縣望

京兆府醴泉縣後唐長興元年五月勅京兆府醴泉縣依舊為次赤縣雲陽縣富

平縣三原縣後唐天成二年七月勅富平等三縣比屬西畿並是次赤縣後因置耀州割元屬邑

河南府新安縣後唐天成二年二月為次赤且屬耀州

宗雍 應州金城縣鴈門縣混源縣寰清縣後唐天成四年曹州濟陰縣

應州為望州金城鴈門為望縣混源為上縣寰清為次縣以明宗潛龍鄉里故也

後唐天成四年十一月升為次赤以奉景宗陵涇州平涼縣慶州同川縣安州

吉陽縣晉天福二年正月尚書吏部奏自清泰三年

吉陽平涼並為中縣同川為下縣鄭州管城縣周顯德六年十月升

鄭縣周顯德元年八月升為次赤以奉太祖嵩陵

後唐天成三年十二月勅真定府屬縣淮河中鳳翔例升為次畿真定縣升為次赤

晉天福二年正月勅應京畿及諸州縣舊有唐朝諸帝



陵并真源等縣並不為次赤卻以畿甸緊望為定其逐縣令不得以陵臺結銜考滿日仍依出選門官例處分隔任後卻據資品准格例施行

開運二年六月吏部奏其四輔州鄭汝州仍舊為輔州同華州准勅既廢雍京不合為輔州欲定為望州滑州曹州比類近京欲升為輔州從之

州縣分道改置

後唐長興三年四月中書門下奏據十道圖舊制以王者所都之地為上本朝都長安遂以關內道為上今宗

廟宮闕皆在洛陽請以河南道為上關內道為第二河東道第三河北道第四劍南道第五江南道第六淮南道第七山南道第八隴右道第九嶺南道第十從之

河南道

滑州酸棗縣長垣縣梁開平三年二月割隸汴州後唐同光二年二月酸棗縣卻隸滑州  
長垣縣卻改為匡城縣晉天福三年鄭州中牟縣陽武縣  
梁開平三年二月割隸汴州後唐同光二年二月勅中牟縣卻隸鄭州晉天福三年十月割隸汴州後唐同光二年十月復割隸鄭州晉天福三年十月復割隸鄭州晉天福三年十月復割隸鄭州晉天福三年十月復割隸鄭州



州扶溝縣鄆陵縣梁開平三年二月鄆陵縣許州後唐同  
元年九月扶溝縣許州後唐同  
天福三年十月並割屬開封府  
隸汴州後唐同光二年二月復隸陳州太康縣梁開平三  
年四月割  
隸宋州  
宜卻屬單州其輝  
州依舊為碭山縣汝州葉縣襄城縣後唐同光二年二月  
縣元屬汝州今隸許州伏緣最鄰京臨汝縣周顯德三  
畿戶口全少伏乞割隸汝州從之  
密州輔唐縣梁開平二年八月改為安邱縣後唐同光  
月改為膠西濟州周廣順二年九月割兗州任城中都單  
縣避國諱也  
州金鄉等縣隸之至其地望為上割兗州任城中都單  
鄆州鄆城縣隸之中都縣卻隸鄆州

瞻國軍升為州其地望為上直屬  
 京割棣州勃海蒲臺兩縣隸之

關內道

京兆府奉先縣梁開平三年二月割隸同州後唐  
好時縣後唐長興元年五月勅併渭南縣周顯德三年  
州同官縣梁開平三年七月割隸同州後美原縣後唐  
三年七月華州洛南縣後唐同光三年六月河府屬當  
割隸耀州華州洛南縣後唐同光三年六月河府屬當  
府其澄城縣今請卻屬同州韓城郃陽澄城縣且屬府隴  
從之天成元年七月勅韓城郃陽二縣卻割隸同州隴  
州汧陽縣汧源縣吳山縣後唐長興元年五月割隸同州隴  
縣後唐清泰三年正月涇州理所遂罷平涼縣自吐蕃陷渭州  
權于平涼縣為渭州理所遂罷平涼縣自吐蕃陷渭州



武兩鎮兼屬平涼其賦租節目並無縣管今臨涇縣唐後  
 請卻置平涼縣管安國耀武兩鎮人戶從之  
 清泰三年二月原州刺史翟建奏本州自陷吐蕃權于  
 臨涇縣為理所屬涇州屬州刺史只管捕盜其人戶  
 即涇州管縣既無屬州刺舉何州刺史只管捕盜其人戶  
 施伏乞割歸臨涇屬州從之  
 為昭化縣後唐同光元年咸寧縣周顯德三年廢  
 年十月復為鄜州城縣元咸寧縣周顯德三年廢  
 年五月勅靈州方渠鎮宜升為威州隸武靈州  
 木波馬嶺二鎮隸之周顯德五年六月廢  
 四年九月降  
 為通遠軍  
 為潘源縣  
 隸涇州

河東道

絳州

梁開平四年四月割隸晉州後唐

同光二年六月割屬河中府 慈州隰州同光

二年六月儀州梁開平三年閏八月勅兗州管內已有  
 制隸晉州沂州其儀州改為遼州晉天福五年三  
 月并沁州割隸潞州六年解州漢乾祐元年九月升解  
 七月并沁州割隸太原  
 安邑解三河中府稷山縣後唐同光二年慈州作城縣  
 縣為屬邑  
 呂香縣周顯德三年三月降

河北道

鎮州後唐同光元年四月改為北幽州北平縣後唐長  
 鎮州京至十一月卻復為成德縣周顯德三年十  
 八月改為滄州長蘆縣乾符縣周顯德三年十  
 燕平縣  
 周顯德五年弓高縣周顯德六年二博州武水縣周顯  
 改為保順軍月并入東光縣  
 年十月併深州博野縣周顯德四年五澤州梁開平元  
 入聊城縣



隸河陽四年二月 **德州** 晉天福五年十一月移就長河縣為理所 後唐天

月御隸潞州 三月升奉化軍為泰州以清苑縣為理所至晉開運二

年九月移就滿城縣至周顯德六年五月以瓦橋關為雄州

縣割隸 **雄州霸州** 周顯德六年五月以瓦橋關為雄州

州割文安大成二縣隸之地望 並為中州時初平關南故也

**劍南道**

**蜀州唐興縣** 梁開平二年八月改為陶胡縣後 **彭州唐**

**昌縣** 梁開平二年八月改為歸化縣後 唐同光元年十月復為唐昌縣

**江南道**

**杭州臨安縣** 梁開平二年正月改為安國縣 **福州閩清縣** 梁乾化元年

溪場 **蘇州吳江縣** 梁開平三年閏八月兩 **明州望海縣**

梁開平三年閏八月兩浙奏置 **處州松陽縣** 梁開平四年五月 **秀州** 晉天

年十月兩浙錢元瓘奏 **全州** 晉天福四年四月湖南馬

以杭州嘉興縣置州 置清湘縣并割 灌陽縣隸之

**淮南道**

**壽州** 周顯德四年移于潁州下蔡縣仍以盛唐縣 梁開

年八月改為壽州 同光元年十月復為盛唐

**山南道**

**復州** 梁乾化二年十月割隸荆南後唐天成二年五月



果州後唐天成二年唐州慈邱縣周顯德三年三月廢鄧州臨湍

縣漢乾祐元年正月改菊潭縣向城縣周顯德三年三月廢商州

乾元縣漢乾祐二年六月改襄州樂鄉縣周顯德六年

城

隴右道

秦州天水縣隴城縣後唐長興三年二月秦州奏見管

徵科並係鎮將今請以歸化怨水五龍黃土四鎮就歸

赤砂鎮復置舊隴城縣赤砂染坊夕陽南台鐵務五鎮就

澤良恭三鎮割屬天水縣其白石大成州同谷縣栗亭縣

後唐清泰三年六月秦州奏階州元管將利福津兩縣

並無巡鎮成州元管同谷縣餘並是鎮便係徵科今欲

取成州西南近便鎮分併入同谷縣其東界四鎮別創

一縣者州西南有府城長豐魏平三鎮其地東至泥陽

鎮界二十五里西北至黃竹路金砂鎮界五十里南至興

州界砂地嶺四十五里其嶺管界併人同谷縣廢具

鎮額州東界有勝仙泥陽金砂栗亭四鎮東至鳳州姜

贍鎮界一十五里南至果州界二十里北至高橋界三

十五里西至同谷界三十五里北至秦州界六十七里

欲併其四鎮地于栗亭縣其徵

科委縣司捕盜委鎮司從之

嶺南道

潘州茂明縣梁開平元年五月改越常縣至桂州純

化縣梁開平元年五月改歸化縣後邕州晉天福七

為誠州溥州晉開運三年三月升桂州全義縣為州仍

避廟諱溥州改全義縣為德昌縣并割桂州臨川廣明



王仁會要 卷二十一  
義寧等三縣隸之從  
湖南馬希範奏也

選事上

後唐同光二年八月中書門下奏吏部三銓下省南曹  
廢置甲庫格式流外銓等司公事並繫長定格循資格  
十道圖等格式前件格文本朝勅立檢制奸濫倫敘官  
資頗謂精詳久同遵守自亂離之後巧偽滋多兼同光  
元年八月車駕在東京權判南曹工部員外郎盧重本  
司起請一卷益以興復之始務切懷來凡有條流多失  
根本以至冬集赴選人并南郊行事官及陪位宗子其

一千三百餘人銓曹檢勘之時互有援引去留之際不  
絕爭論若又依違必長訛濫望差權判尚書省銓左丞  
崔沂吏部侍郎崔貽孫給事中鄭韜光李光序吏部員  
外郎盧損等同詳定舊長定格循資格十道圖務令簡  
要可久施行從之

天成二年三月二十四日銓司奏據南曹駁放選人累  
經銓及經中書門下論訴准堂判具新舊過格年限分  
析申上者伏以選人或有出身或因除授各拘常例方  
赴調集多因遠地兵戈兼以私門事故遂致過格固非



願爲新條標在七年舊格容於十載臣等參詳其選人過格年限伏請且依舊格不問破憂停集本數過格十年外不在赴選之限從之其年十二月二十九日中書門下條流應諸道選人等選人中有過格年深無門參選者准天成二年十月二十三日德音並委吏部南曹磨勘如實會阻兵戈者許令注擬如或詐稱不在此限者凡是選人專思合格不肯固踰選限自滯身名縱阻干戈須在州縣有應過格人等仰吏部南曹子細磨勘會阻兵戈州府去處或會假攝卽有隨處文牒一一詣

實卽便送銓司亦須參詳先授告身攝牒及審驗年貌方可注擬參銓注擬自有常規從前或有宰臣占著好州縣官員闕不令銓曹注授今年應是元闕並送銓曹候移省之時若有好闕尙在必議勘尋其請託及受囑人等當行黜責選人之內族類甚多歷任之中資考備在應南曹判成人等仰三銓各據逐人出身入仕文書一一比驗年貌灼然不謬方與注官據長定格選人中有隱憂者遲五選伏以人倫之貴孝道爲先既有負于尊親定不公于州縣有傷風教須峻條章今後諸色官



員內有隱憂冒榮者勘責不虛終身不齒所有入仕已  
來告勅並赴所司焚毀從之

一、  
二、  
三、  
四、  
五、  
六、  
七、  
八、  
九、  
十、  
十一、  
十二、  
十三、  
十四、  
十五、  
十六、  
十七、  
十八、  
十九、  
二十、

五代會要卷二十一



